



CONVENIO ENTRE O INSTITUTO GALEGO DE PROMOCIÓN ECONÓMICA (IGAPE) E A ASOCIACIÓN DE EMPRESARIOS GALEGOS DE MADRID (AEGAMA) PARA O FOMENTO DA COOPERACION ENTRE EMPRESARIOS DE ORIXE GALEGO DE MADRID E EMPRESARIOS GALEGOS DE GALICIA

REUNIDOS

Dunha parte, Covadonga Toca Carús en nome e representación do Instituto Galego de Promoción Económica, con NIF Q6550010J e domicilio social no Edificio Igape, Complexo Administrativo San Lázaro, s/n, 15707 Santiago de Compostela, en calidade de directora xeral. Está facultada para este acto en virtude da delegación de facultades recollida na Resolución do 18 de setembro de 2023 (DOG núm. 184, do 27 de setembro de 2023).

E doutra, Julio Lage González, en nome e representación da ASOCIACIÓN DE EMPRESARIOS GALEGOS DE MADRID (AEGAMA), constituída en Madrid o 22 de maio de 1990, inscrita no Rexistro Provincial de Asociacións da Delegación do Goberno en Madrid, baixo o nº 10.678 o 18 de setembro de 1990, CIF nº G-79532354, con enderezo Rúa Ourense, 10 2ª Planta, Oficina 10, Madrid.

Todas as partes recoñécense mutuamente con capacidade xurídica abondo para formalizar este acordo e manifestan ter vixentes os seus poderes e ter capacidade suficiente para obrigar ás súas representadas en virtude do presente convenio, e para tal efecto

EXPOÑEN

PRIMEIRO.- Que o Instituto Galego de Promoción Económica (en adiante, Igape), creado pola Lei 5/1992, do 10 de xuño, é un ente de dereito público adscrito á Consellería de Economía, Industria e Innovación polo Decreto 79/2023, de 22 de xuño. Configúrase como un instrumento básico de actuación da Xunta de Galicia para o impulso do desenvolvemento competitivo do sistema produtivo galego, promovendo actividades que contribúan á creación de emprego baseado nun tecido empresarial moderno, internacionalizado e competitivo.

Entre as funcións encomendadas ao Igape en relación á expansión exterior –en virtude do disposto no artigo 4 da súa lei de creación–, están as de promover a creación de empresas nos distintos sectores de actividade económica que teñan maior impacto e vantaxes comparativas para o desenvolvemento da economía galega, favorecer a modernización e innovación tecnolóxica e organizativa das empresas galegas, proporcionar información sobre os mercados e favorecer o desenvolvemento das exportacións e acordos con empresas estranxeiras, así como apoiar e promover calquera tipo de actividades que contribúan á mellora do sistema produtivo de Galicia especialmente as de maior importancia estratéxica.

SEGUNDO.- Que a Asociación de Empresarios Galegos de Madrid (en adiante AEGAMA) foi constituída o 22 de maio de 1990, e se rexe polos seus estatutos, pola Lei Orgánica 1/2002, do 22 de marzo, reguladora do dereito de asociación, polas disposicións complementarias e por calquera outras que lle poidan ser de aplicación, no marco da Constitución Española, especialmente polo disposto no seu artigo 22.



Entre as actividades e fins de AEGAMA cabe resaltar, entre outras, as seguintes:

- A representación dos seus membros en orde a súa actividade; especialmente á promoción comercial e difusión dos seus produtos e servizos.
- Fomento da solidariedade de todos os membros da asociación, promocionando e creando servizos propios e de interese común para os asociados.
- Intercambio de experiencias e información entre os seus membros.
- Potenciación dos contactos cos directivos, empresarios e profesionais galegos emigrados e impulso da creación de empresas conxuntas ou mixtas.
- Axuda ao desenvolvemento económico, cultural e científico de Galicia mediante as accións que se determinen.
- Establecemento de relacións con outras asociacións semellantes, en especial as constituídas por empresarios galegos.
- Axudar ao perfeccionamento das técnicas de xestión empresarial entre os seus asociados.
- Fomento do desenvolvemento das actividades relacionadas coa formación para o emprego, a investigación e a innovación tecnolóxica.
- Organización de encontros para intercambios de experiencias entre os asociados e fomento da súa interrelación, en orde á mutua colaboración.
- Estimular a eficacia e promover valores éticos no desempeño dos negocios e das actividades, resolvendo as diverxencias entre os asociados, cando sexa solicitado.
- Proporcionar a libre discusión de todos os asuntos de interese dos asociados no ámbito exclusivo das súas actividades.
- Orientar aos asociados sobre as perspectivas de mercado, a implantación de empresas, participacións e investimentos.
- Mantemento dun órgano de orientación xurídica e de consultas.
- Administrar e dispor dos recursos da asociación, sexan orzamentarios ou patrimoniais e aplicalos para os fins e actividades propias.
- Manter unha estreita relación coas organizacións empresariais existentes e estimular a adhesión dos seus asociados ás organizacións patronais de Madrid, integradas na CEOE.
- Desenvolver proxectos de investigación e estudo de campos sectoriais e territoriais nos ámbitos formativo, social, económico e medioambiental, e todos aqueles relacionados coa actividade dos asociados.
- Potenciar as relacións empresariais e sociais a través da colaboración con empresarios e profesionais e entidades públicas ou privadas de Galicia.
- Todas cantas outras funcións de semellante natureza se consideren convenientes para o cumprimento dos seus fins e para a lexítima defensa dos seus membros.

Para o mellor cumprimento dos fins sinalados, AEGAMA poderá levar a cabo, entre outras, as seguintes accións:

- Publicacións informativas para os asociados.
- Xornadas de negocios, almozos de traballo e almozos con debates.
- Potenciar acordos de colaboración con empresas.
- Organizar un premio anual ao Galego do Ano.
- A representación da Asociación a nivel institucional.
- A Constitución por acordo da Xunta Directiva, dentro do seno da asociación, das comisións e grupos de traballo que se consideren convenientes na forma e condicións de funcionamento e xestión establecidas nos estatutos.

TERCEIRA.- Co fin de promover a cooperación entre empresarios e profesionais de Galicia e empresarios socios da AEGAMA considérase oportuna a sinatura deste convenio.

Son obxectivos fundamentais deste convenio a información e detección de oportunidades de negocio entre os seus membros e asociados, o establecemento de alianzas comerciais, tecnolóxicas e profesionais, así como a realización de investimentos individuais ou conxuntos en Galicia.



Dada a especificidade do obxecto do convenio non procede a realización dunha convocatoria pública para o desenvolvemento das actuacións deste, debido ás especiais características e singularidade de AEGAMA, na súa condición de entidade promotora dos intereses dos empresarios galegos en Madrid, o que xustifica o carácter excepcional e as razóns de interese público, social e económico que aconsella a concesión dunha subvención directa para estas actuacións. Por todo o anterior, a subscrición do presente convenio de subvención directa representa o instrumento adecuado de apoio aos obxectivos estratéxicos do sector e de interese xeral pretendidos polas partes asinantes, circunstancia que determina a dificultade de promover a concorrência pública, para os efectos do establecido no artigo 15.2 da Lei 1/2016, do 18 de xaneiro, de transparencia e bo goberno, nos artigos 19 e 26 da Lei 9/2007, do 13 de xuño, de subvencións de Galicia e no artigo 40 do Decreto 11/2009, do 8 de xaneiro, polo que se aproba o regulamento da citada Lei.

Polo anteriormente exposto, a AEGAMA e o Igape están interesados en colaborar para a consecución dos obxectivos comúns nas materias ás que se fai mención nos expositivos precedentes e, para ese efecto, subscriben o presente convenio de acordo coas seguintes

CLÁUSULAS

PRIMEIRA.- OBXECTO E ACTUACIÓNS

O presente convenio ten por obxecto regular a colaboración entre o Igape e a AEGAMA para o fomento da cooperación entre empresarios galegos de Galicia e os empresarios de orixe galego de Madrid co obxectivo de fortalecer os negocios e alianzas deste colectivo, establecendo as bases que permitan a realización das seguintes actuacións:

Nome acción	Descrición acción
Premio Victoriano Reinoso	Cea de gala con entrega de premio a un empresario relevante para Galicia. Premio anual. Asistencia aproximada 200 pax. Madrid - 28/02/2024
Encontro anual de empresarios galegos e madrileños polo mundo	Encontro internacional anual de empresarios galegos e madrileños onde participan tamén, aqueles que residen ou teñen negocios no estranxeiro. Asistencia aprox. 200px Galicia - Verán 2024
Entrega de premios AEGAMA do verán	Cea de gala con entrega de premios internacionais a empresarios relevantes. Asistencia aprox. 200px. Galicia Verán 2024
Almorzo: a auga, un recurso vital e escaso	Almorzo centrado no ciclo integral da auga. Coa participación Asistencia aprox. 80 px Madrid - Terceiro trimestre 2024
Presentación anual de Galicia a empresarios madrileños	Xantar, coloquio autoridades da Consellería de Economía, Industria e Innovación e do Igape, con participación de empresarios relevantes en Madrid. Asistencia aprox. 80 px. Madrid - Terceiro trimestre 2024

SEGUNDA.- FINANCIAMENTO

O orzamento estimado para a execución das actuacións recollidas na cláusula primeira é de trinta e seis mil setecentos euros (36.700,00 €) que se distribúen do seguinte xeito:



Nome acción	Descrición acción	Custo total estimado realización acción
Premio Victoriano Reinoso	Cea de gala con entrega de premio a un empresario relevante para Galicia.	8.000€
Encontro anual de Galegos polo mundo	Encontro internacional anual de empresarios galegos polo mundo.	8.000€
Entrega de premios AEGAMA do verán	Cea de gala con entrega de premios internacionais a empresarios relevantes.	9.000€
Almorzo: a auga, un recurso vital e escaso	Almorzo centrado no ciclo integral da auga.	5.000€
Presentación anual de Galicia a empresarios madrileños	Xantar, coloquio autoridades da Consellería de Economía, Industria e Innovación e do Igape, con participación de empresarios relevantes en Madrid.	6.700€
TOTAL		36.700 €

Deste orzamento, o Igape financiará a contía de vinte mil euros (20.000,00 €), con cargo á aplicación orzamentaria 09.A1.741A.481.0 dos orzamentos xerais da Comunidade Autónoma Galega para o ano 2024.

AEGAMA contribuirá cunha achega de dezaseis mil setecentos euros (16.700 €) cos que cofinanciará os gastos de servizos recollidos no anterior cadro.

Non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado nesta cláusula, cando obedezan a razóns xustificadas e as actuacións que se leven a cabo garden relación directa co obxecto do presente convenio e se compensen uns conceptos con outros, conforme ao previsto no artigo 74.2 do Regulamento da Lei 9/2007, do 13 de xuño, de subvencións de Galicia.

TERCEIRA.- GASTOS SUBVENCIONABLES

1. De acordo co previsto no artigo 29 da Lei 9/2007, do 13 de xuño, consideraranse subvencionables os gastos que, sen admitir dúbida, respondan á natureza da actividade subvencionada de acordo coa previsión de orzamento recollida na cláusula segunda e que se realicen a partir do 1 de xaneiro de 2024 e ata o 1 de decembro de 2024.

En ningún caso o custo de adquisición dos gastos subvencionables poderá ser superior ao valor de mercado.

En ningún caso se considerarán gastos subvencionables, os impostos indirectos cando sexan susceptibles de recuperación ou compensación nin os impostos persoais sobre a renda. O imposto sobre o valor engadido (IVE) poderase considerar gasto subvencionable cando a entidade beneficiaria acredite mediante a correspondente certificación que se encontra acollida ao réxime de exención, parcial ou total, do IVE.

2. Serán elixibles os gastos relacionados coas actuacións descritas no cadro da cláusula segunda sendo os gastos detallados os seguintes:



- Custos de persoal de AEGAMA: calculados en base a nóminas pagadas, gasto de seguridade social e importes retidos en concepto de IRPF, e certificación de dedicación ao proxecto.
- Gastos de contratación dos servizos externos necesarios para a organización dos eventos descritos.
- Gastos de organización de eventos e cátering.
- Contratación de relatores.
- Alugueiro de espazos para a celebración dos eventos.
- Contratación xeral de medios para a realización dos eventos.
- Programas, folletos e material para os asistentes aos eventos.
- Servizos de cátering.
- Servizos audiovisuais, gravación e edición.
- Gastos de presentadores dos eventos.
- Gastos de promoción e difusión.

CUARTA.- OBRIGA DAS PARTES

I. A AEGAMA queda obrigada á realización do obxecto do presente convenio e a realizar todas as actividades precisas para que as actuacións do convenio se desenvolvan correctamente, comprometéndose a:

- Desenvolver as accións previstas no anexo II do convenio para o ano 2024.
- Achegar un total de dezaseis mil setecentos euros (16.700 €) para o cofinanciamento das accións recollidas no anexo II.
- Incrementar as relacións entre a AEGAMA e o Igape e a Xunta de Galicia.
- Favorecer os contactos entre a Xunta de Galicia, o Igape e as principais institucións económicas e empresariais promovendo acordos e/ou convenios con, entre outros, as principais institucións ou asociacións empresariais madrileñas, que contribúan a facilitar desenrols e cooperación económicas.
- Levar a cabo, directamente ou en colaboración con outras entidades, as actuacións que propoña ao amparo deste convenio, a Xunta de Galicia, o Igape, os clústeres ou as asociacións galegas que contribúan a fomentar a colaboración entre os empresarios galegos socios da AEGAMA e as empresas galegas, ben directamente ou ben a través das asociacións e clústeres.
- Divulgar, buscar activamente e propoñer Galicia como destino de investimento dos empresarios socios da AEGAMA.
- Realizar, unha vez ao ano en data a convir, ben presencialmente ou ben virtualmente, un encontro entre o Igape e a Consellería de Economía, Industria e Innovación cos socios da AEGAMA para informar sobre as diferentes accións de promoción e desenvolvemento económico que se están levando a cabo por parte da Xunta para axudar ás empresas galegas.
- Achegar, antes do vencemento do prazo de xustificación un informe final anual coas principais accións desenvoltas ao longo do ano, que acrediten as actividades desenvolvidas, así como os informes e demais documentos que, de ser o caso, sexan requiridos polo Igape, aos efectos da correcta xustificación do desenvolvemento das actividades subvencionadas.
- Achegar, nos primeiros 10 días dos meses de abril, xullo e outubro de cada ano no que estea vixente o convenio, un boletín ou informe trimestral no que se indiquen os principais eventos, accións e noticias acaecidas no trimestre correspondente. Os ditos boletíns remitiranse vía e-mail ao Igape.



- Someterse á inspección e control do Igape co obxecto de supervisar o cumprimento das actividades previstas no convenio e que permitan a esta a súa xustificación financeira.
- Cumprir as normas sobre confidencialidade de datos previstas na Lei orgánica 3/2018, do 5 de decembro, de protección de datos persoais e garantía dos dereitos dixitais.
- Facer constar expresamente a colaboración prestada por Igape en todo o material de execución das actividades do convenio coa utilización do seu correspondente logotipo identificativo.
- Achegar a información que lle sexa requirida pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de control do destino do investimento.

II. Compromisos e obrigas do Igape:

- Colaborar no financiamento do custo das actuacións previstas a través da concesión dunha subvención por importe máximo de vinte mil euros (20.000,00 €).

QUINTA.- XUSTIFICACIÓN E PAGAMENTO

Conforme ao estipulado no artigo 60 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, Igape, efectuará o pago da cantidade estipulada no convenio a AEGAMA, previa comprobación da realización do obxecto do convenio e validada a documentación xustificativa presentada en Igape.

En todo caso, só se considerará gasto realizado o que fose efectivamente pagado durante o período de execución, sempre que se respecten os prazos de pago previstos na normativa sectorial que lle sexa de aplicación ou, na súa falta, nos establecidos na Lei 3/2004, do 29 de decembro, pola que se establecen medidas de loita contra a morosidade nas operacións comerciais, en aplicación da Lei 18/2022, do 28 de setembro, de crecemento e creación de empresas.

Exceptúanse desta regra xeral aqueles gastos cuxos pagos deban efectuarse nun momento posterior por axustarse aos calendarios de recadación, como os ingresos á conta do IRPF ou cotas de seguros sociais liquidables con posterioridade á data de xustificación. A entidade subvencionada quedará obrigada a presentar os documentos acreditativos do seu pago antes de finalizar o mes seguinte ao que o beneficiario lle corresponda liquidar eses gastos.

O prazo de presentación da solicitude de cobramento no Igape será desde o día seguinte á finalización das accións indicadas na cláusula primeira e ata como máximo o 1 de decembro de 2024.

A xustificación presentarase vía electrónica na oficina virtual do Igape na páxina <https://www.igape.gal/gl/oficinavirtual>, en particular, a través do código de procedemento PE001, achegando as copias dixitalizadas da documentación que se relacionan a continuación. A AEGAMA responsabilizarase da veracidade dos documentos que presenten.

A solicitude de cobramento virá acompañada da seguinte documentación:

- a) Informe/memoria xustificativa asinada e selada polo seu representante legal do cumprimento das condicións impostas neste convenio, con indicación das accións levadas a cabo, *dossier* fotográfico e resultados obtidos.



b) Certificación dos gastos, segundo o modelo do Anexo I, facendo distinción entre: gastos de persoal, gastos de subministracións e servizos e outros.

c) Certificacións expedidas polas respectivas administracións públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Xerencia do Igape realice estas consultas polos seus propios medios, segundo o anexo I.

d) Declaración responsable asinada polo representante legal con poder suficiente, doutras axudas de carácter público ou privado para os mesmos gastos obxecto deste convenio ou, se é o caso, ausencia das mesmas, segundo o anexo I.

e) Declaración responsable da titularidade da conta bancaria onde se debe realizar o pagamento, segundo o anexo I.

f) No caso de estar exento do imposto sobre o valor engadido (IVE), documentación acreditativa da mencionada exención.

g) Breve informe sobre a situación de AEGAMA que faga referencia ao número de asociados, altas e baixas ao longo da vixencia do convenio.

h) Ademais, e para xustificar a aportación de AEGAMA ao presente convenio, relación, mediante documentos oficiais correspondentes tales como facturas, nóminas, etc., dos gastos propios incorridos para o desenvolvemento das distintas obrigas que asume.

Todos os gastos computables deberan ser xustificados mediante transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.

Será obrigatorio presentar tres orzamentos para todos aqueles gastos externos superiores a 15.000 € + IVE e xustificar a selección do proveedor en caso de non ser o máis económico.

Os gastos nos que se incorra serán compatibles con outras cantidades públicas ou privadas que puidese recibir, que deberán ser declaradas nas liquidacións do convenio, e reducirán o importe total a achegar polos asinantes na mesma porcentaxe que achegan ao convenio. Todos os gastos externos xustificados deben axustarse a prezos de mercado, polo que podería solicitarse unha auditoría sobre os gastos xustificados, no caso de que non exista outro patrón de público coñecemento que permita establecer o dito axuste.

En todo caso, o Igape, resérvase o dereito de solicitar toda a documentación que considere precisa en relación coa realización das actuacións obxecto deste convenio, e calquera outra que estime oportuna para a correcta xustificación do gasto e o seu pagamento.

Procederá a minoración da subvención cando as actuacións desenvolvidas e xustificadas o abeiro deste convenio non acaden os importes dos gastos xustificables e sempre que esta minoración non supoña unha realización deficiente do proxecto.

A AEGAMA manterá a disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo.



SEXTA.- DIRECTORIO DE EMPRESAS E PROFESIONAIS GALEGOS DA ASOCIACIÓN DE EMPRESARIOS GALEGOS DE MADRID

Coa sinatura do presente convenio, AEGAMA comprométense a entregar nun prazo de tres meses o directorio actualizado de empresarios e profesionais de orixe galego pertencentes á asociación.

SÉTIMA.- DIFUSIÓN

A AEGAMA comprométese a difundir e promocionar entre os seus asociados, tanto a sinatura do presente convenio, como as actuacións que se desprendan do mesmo, para desta maneira axudar ao seu mantemento e crecemento.

OITAVA.- VIXENCIA E CAUSAS DE RESOLUCIÓN

O presente convenio entrará en vigor o día da sinatura do mesmo e terá duración ata o 30 de decembro de 2024, podendo prorrogarse por un ano adicional, ata o 30 de decembro de 2025, previo acordo das partes.

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Serán causas de resolución do presente convenio procedendo ao reintegro, total ou parcial, da axuda percibida e dos xuros de mora correspondente dende o momento do pagamento da subvención ata a data na que se acorde a procedencia do reintegro, as determinadas no artigo 33 da Lei 9/2007, do 13 de xuño.

En especial, son causas de resolución do presente convenio as seguintes:

- A desviación dos fondos outorgados para outra finalidade distinta da sinalada neste convenio.
- O incumprimento da obriga da xustificación do investimento realizado.
- O incumprimento de calquera outra das cláusulas establecidas no convenio.
- O transcurso do tempo estipulado sen que se desenvolva o mesmo.
- O acordo mutuo das partes.

O incumprimento total dos fins/obxectivos do convenio, determinado a través dos mecanismos de seguimento e control, da realización do gasto subvencionable ou da obriga de xustificación, serán causa de perda do dereito ao cobramento ou de reintegro total da subvención.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a súa liquidación.

NOVENA.- COMISIÓN DE SEGUIMIENTO

Coa finalidade de asegurar o cumprimento deste convenio, creárase unha Comisión de Seguimento de composición paritaria, que coordinará o seu desenvolvemento. Reunirase a



petición dunha das partes, e actuará como órgano de vixilancia, seguimento e control do establecido neste convenio.

A citada comisión estará presidida por un dos representantes do Igape. En todo o non especificamente previsto sobre o funcionamento desta comisión, serán de aplicación as normas sobre órganos colexiados previstas no capítulo II do título Preliminar da Lei 40/2015, de 1 de outubro, de réxime xurídico do sector público, e na sección III, capítulo I, título I (artigos 15 e seguintes) da Lei 16/2010, de 17 de decembro, de organización e funcionamento da Administración xeral e do sector público autonómico de Galicia. A propia comisión, unha vez constituída, decidirá o réxime das súas reunións.

DÉCIMA.- MODIFICACIÓNS DO CONVENIO

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas ou a ampliación do seu prazo de execución.

Toda alteración nas accións a realizar, agás as sinaladas no parágrafo anterior, deberá ser obxecto de autorización por Igape e formalizarse mediante a correspondente addenda ao presente convenio, consonte o artigo 35 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

UNDÉCIMA.- PUBLICIDADE E AUTORIZACIÓNS

AEGAMA dá consentimento expreso a Igape para:

- a) O tratamento necesario dos datos relevantes deste convenio e a súa publicación na páxina web do Igape, así como no *Diario Oficial de Galicia*, coas excepcións previstas no artigo 15.2º d) da Lei 9/2007, do 13 de xuño, de subvencións de Galicia.
- b) Incluír e facer público, a través do Portal de Transparencia e Goberno aberto e nos rexistros regulados polo Decreto 132/2006, do 27 de xullo, polo que se regulan os rexistros públicos de axudas, subvencións e convenios e sancións, os datos referidos ás axudas e subvencións recibidas ao abeiro do presente convenio.
- c) O cumprimento do disposto no artigo 20 da Lei 38/2003, do 17 de novembro, xeral de subvencións, polo que a información relativa ao convenio requirida no ordinal oitavo do devandito artigo será comunicada á Base de datos nacional de subvencións (BDNS).

DUODÉCIMA.- PROTECCIÓN DE DATOS DE CARÁCTER PERSOAL

En virtude do disposto no artigo 26 do Regulamento (UE) 2016/679, xeral de protección de datos (RXPd) e na Lei orgánica 3/2018, do 5 de decembro, de protección de datos persoais e garantía dos dereitos dixitais (BOE nº 294, do 6 de decembro), se calquera das partes accede a datos de carácter persoal contidos en ficheiros titularidade de AEGAMA, adquiren a condición de encargados do tratamento e comprométense a:

- Non utilizar nin tratar datos de carácter persoal cunha finalidade distinta á execución do convenio, non comunicar os datos baixo ningún concepto a terceiras persoas, nin sequera para



a súa conservación e, en especial, non reproducir, nin publicar, nin difundir ningunha información acerca dos datos.

- Garantir o cumprimento das medidas de seguridade establecidas, así como a súa correcta implementación.
- Ao termo da relación, por calquera causa, os datos de carácter persoal aos que tiveran acceso as restantes partes, deben ser destruídos ou devolverse a AEGAMA, incluíndo calquera soporte ou documento.

O incumprimento destas obrigas fai responder ás restantes partes das infraccións que cometa coma se ocupase a posición de responsable do tratamento.

O Igape responde fronte a AEGAMA do cumprimento destas obrigas polas persoas que na súa representación participen de calquera modo na execución do convenio.

DÉCIMO TERCEIRA.- RESPONSABILIDADE

A subscrición deste convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e o Igape, de tal xeito que non se poderá esixir a este Instituto responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

DÉCIMO CUARTA.- NATUREZA E RESOLUCIÓN DE CONTROVERSIAS

O presente convenio ten carácter administrativo e asínase ao abeiro dos artigos 19.4 e 26 da Lei 9/2007, do 13 de xuño, de subvencións de Galicia, rexéndose para os seus efectos polo establecido nas súas cláusulas e polas previsións do Decreto 11/2009, de 8 de xaneiro, polo que se aproba o regulamento do citado texto legal. Ambas partes comprométense a resolver de común acordo, ante a Comisión de Seguimento, calquera controversia que puidera suscitarse sobre a interpretación ou execución deste convenio.

O Igape ostentará as potestades específicas derivadas da relación xurídica subvencionadora. Os actos ditados en exercicio das devanditas potestades serán de coñecemento e competencia da Orde Xurisdiccional do Contencioso-Administrativo.

E en proba de conformidade, as partes asinan o presente convenio o 18 de marzo de 2024.

Polo Igape,

Covadonga Toca Carús
Directora xeral

Por AEGAMA,

Julio Lage González
Presidente



ANEXO I

DECLARACIÓNS E AUTORIZACIÓNS

Don/Dona con DNI en nome e representación da entidade ASOCIACIÓN DE EMPRESARIOS GALEGOS DE MADRID, con número de identificación fiscal.....,

DECLARO, baixo a miña responsabilidade, que a entidade a que represento non mantén ningunha débeda nin obriga pendente coa administración tributaria estatal española e galega, coa Seguridade Social española nin coa Xunta de Galicia.

AUTORIZO expresamente ao Igape: para que solicite da Axencia Estatal da Administración Tributaria, da Consellería de Facenda e Administración Pública e da Seguridade Social a información relativa ao cumprimento por parte da entidade que represento das obrigas tributarias estatais e autonómicas, as obrigas coa Seguridade Social e de ausencia doutras débedas coa Comunidade Autónoma.

A entidade comprométese a comunicar ao Igape calquera cambio ou novidade na información que pola presente se declara, a partir da data abaixo sinalada e ata a finalización da liquidación da presente anualidade do convenio de referencia.

DECLARO, baixo a miña responsabilidade: que para os mesmos gastos acollidos ao convenio entre o Igape e a ASOCIACIÓN DE EMPRESARIOS GALEGOS DE MADRID para o exercicio 2024, a entidade que represento:

- ☐ Non ten recibido ningunha outra axuda nin pública ni privada.
- ☐ Ten recibido as seguintes axudas polos importes que se detallan:

Organismo convocante	Data de solicitude	Importe solicitado (euros)	Data de aprobación	Importe recibido (euros)

DECLARO que as accións contempladas e realizadas na anualidade _____ incluídas neste convenio entre o Igape e a ASOCIACIÓN DE EMPRESARIOS GALEGOS DE MADRID (AEGAMA) foron as seguintes:

Descrición da acción	Data e lugar celebración	Importe total do custo da acción	Relación das facturas incorridas na celebración da acción, incluíndo importes.



Relación, mediante documentos oficiais correspondentes tales como facturas, nóminas, etc., dos gastos propios incorridos para o desenvolvemento das distintas obrigas que asume AEGAMA, entre os que caben salientar, a modo de exemplo, os seguintes:

Concepto Gasto	Importe do gasto incorrido

Todos os gastos computables deberan ser xustificados mediante transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.

DECLARO, baixo a miña responsabilidade, para os efectos de poder ser beneficiario das contribucións obxecto deste convenio, que os datos consignados nesta declaración relativos á conta bancaria aberta ao nome da entidade a que represento son certos. A falsidade do declarado determinará a imposibilidade de percibir, de ser o caso, os dereitos recoñecidos no procedemento administrativo desde o momento en que se teña constancia da falsidade, sen prexuízo das responsabilidades penais, civís ou administrativas que procedan.

Entidade	Sucursal	D.C.	IBAN

En.....a.....de.....de.....

Asdo.



ANEXO II

PROPOSTA DE ACCIÓNS DA ASOCIACIÓN DE EMPRESARIOS GALEGOS DE MADRID (AEGAMA) PARA O ANO 2024

Don/Dona con DNI en nome e representación da entidade ASOCIACIÓN DE EMPRESARIOS GALEGOS DE MADRID, con número de identificación fiscal.....

DECLARO, baixo a miña responsabilidade, que a entidade a que represento ten planificado levar a cabo ao amparo do presente convenio as seguintes accións ao longo de 2024, dende o 1 de xaneiro de 2024 ata o 1 de decembro de 2024.

Nome acción	Descrición acción	Custo total estimado realización acción
Premio Victoriano Reinoso	Cea de gala con entrega de premio a un empresario relevante para Galicia.	8.000€
Encontro anual de Galegos polo mundo	Encontro internacional anual de empresarios galegos polo mundo.	8.000€
Entrega de premios AEGAMA do verán	Cea de gala con entrega de premios internacionais a empresarios relevantes.	9.000€
Almorzo: a auga, un recurso vital e escaso	Almorzo centrado no ciclo integral da auga.	5.000€
Presentación anual de Galicia a empresarios madrileños	Xantar, coloquio autoridades da Consellería de Economía, Industria e Innovación e do Igape, con participación de empresarios relevantes en Madrid.	6.700€
TOTAL		36.700 €

En, a de de

Asdo.